

四庫全書

子部

欽定四庫全書

子部

黃氏日抄卷三十三

詳校官中書<sub>臣</sub>康綸鈞

刑部郎中<sub>臣</sub>許兆椿覆勘

總校官進士<sub>臣</sub>楊懋珩

校對官監丞<sub>臣</sub>張曾炳

謄錄監生<sub>臣</sub>李金玉

欽定四庫全書

黃氏日抄卷三十三

宋 黃震 撰

讀本朝諸儒理學書一

周子太極通書

太極圖說 無極而太極以下詳太極之理此圖之訓  
釋也惟人也得其秀以下言人極之所以立此所以  
書圖之本意也蓋周子之圖太極本以推人極之原  
而周子之言無極又以指太極之理辨析其精微正

將以歸宿於其人而豈談空之謂哉象山陸氏嘗以  
無極之字大易所未有而老莊嘗有之遂疑其非周  
子之真今觀圖之第二圈陰陽互根之中有圈而虛  
者即易有太極之體也其上之一圈即挈取第二圈  
中之圓而虛者表而出之以明太極之不雜乎陰陽  
單言太極之本體也單出本體於其上初無形質故  
曰無極而太極所謂無極者實即陰陽互根中之太  
極未嘗於太極之上別為一圖名無極也恐不必以

他書偶有無極二字而疑之惟洞見太極之理以自求無愧於人極之立此則周子所望於學者耳

晦庵講明無極此二字雖老子之所有而人皆知非老子之學象山辯駁無極雖斥其為莊老而人反譏其穎悟類禪學而禪學即源流於老莊此固非晚學敢議其寔老子之言無極指茫無際極而言周子之言無極指理無形體而言象山高明豈不曉此一時氣不相下始為此言異時蔡東萊自悔鵝湖之會輒

復妄發則象山之本心偏可知

太極之理至精而太極之圖難狀得晦翁剖析分明  
今三尺童子皆可曉遂獲聞性命之源以為脫去凡  
近之基本即盍反而實修其在我者矣或乃因其餘  
說或演或辯漫成風俗不事躬行惟言太極嗚呼周  
子亦不得已言之孔子惟教人躬行耳

通書 誠上章主天而言故曰誠者聖人之本言天之  
誠即人之所得以為聖者也誠下章主人而言故曰

聖誠而已矣言人之聖即所得於天之誠也誠幾德章居第三者言誠之得於天者皆自然而幾有善惡要當察其幾之動以全其誠為我之德也聖章居第四者言由誠而達於幾為聖人其妙用尤在於感而遂通之神蓋誠者不動幾者動之初神以感而遂通則幾之動也純於善此其為聖也誠一而已人之不能皆聖者係於幾之動故慎動為第五動而得其正為道故道為第六得正為道不淪於性質之偏者能

之而主之者師也故師為第七人必有恥則可教而  
以聞過為幸故幸次之聞於人必思於已故思又次  
之師以問之矣思以思之矣在力行而已故志學又  
次之凡此十章上窮性命之源必以體天為學問之  
本所以修己之功既廣大而詳密矣推以治人則順  
化為上與天同功也治為次純心用賢也禮樂又其  
次治定而後禮樂可興也繼此為務實章愛敬章又  
所以斟酌人品而休休然與之為善蓋聖賢繼天立



極之道備矣餘章皆反覆此意以丁戒人心使自知  
道德性命之貴而無陷辭章利祿之習開示聖蘊終  
以主靜庶幾復其不善之動以歸於誠而人皆可為  
聖賢焉嗚呼周子之為人心計也至矣

諸子之書與凡文集之行於世者或累千百言而僅  
一二合於理或一意而敷繹至千百言獨周子文約  
理精言有盡而理無窮蓋易詩書語孟之流孔孟以  
來一人而已若其闡性命之根源多聖賢之未發尤

有功於孔孟較之聖帝明王之事業所謂揭中天之  
日月者哉

本朝理學闡幽於周子集成於晦翁太極之圖易通  
之書微晦翁萬世莫之能明也肅襟莊誦之為快何  
啻蟬脫塵浣而鵬運青冥哉謹按通書慎動一章周  
子曰動而正曰道晦翁釋之曰動之所以正以其合  
乎衆所共由之道也愚竊意慎動常有謹審之意動  
而合乎正是即為道周子本意恐亦止此若謂合乎

道此動之所以正是乃動而合乎道曰正與動而正  
曰道又成一意恐因此而發明者耳又務實一章周  
子曰君子日休小人日憂晦翁釋之曰實修而無名  
勝之恥故休名勝而無實修之善故憂愚竊恐小人  
未必知以無實為憂果能憂其無實是即君子之用  
心矣何名小人或者小人飾偽無實之心自宜崎嶇  
而多憂書曰作德心逸日休作偽心勞日拙周子之  
所謂憂恐類書之所謂勞者耳姑併誌之以俟知者

云

通書稱禮先而樂後又云古者聖王制禮法修教化  
三綱正九疇敘百姓太和萬物咸若乃作樂以宣八  
風之氣以平天下之情愚謂此與虞廷命官終以典  
樂之意合自魯生有積德百年然後禮樂可興之說  
儒家者流遂挾禮樂之文物制度為希世盛事以傲  
一世謂非我莫能致如王通氏是也至柳子厚又矯  
其弊稱樂不能移風易俗較之周子之書彼皆所謂

野人議壁者哉

周子後錄

遺事十五條 濂溪為南安獄掾程太中一見知非常人二子年方十五六聞其論道即厭科舉業此元氣胥會之一機譬之世道則風雲際會之象也天寔為之豈伊人力也哉其相與授受之要在尋顏子樂處與所樂何事顏子之樂則周子於通書固嘗言之曰見其大而忘其小為爾大者性命之源道德之至尊

至貴小則所謂芥視軒冕塵視金玉者也夫然故嗟  
風弄月自然不勝其樂如吾與點也之意亦正由浴  
沂舞雩脫然自有真樂不見大國足民小國為相區  
區必於有行之為滯累耳周程之相與領會其大若  
此而其剖示於通書者又顯著若此後世有能篤信  
而自得之其樂豈有異乎哉若其極論天地所安之  
處以至於六合之外則周子高明而博學窮極造化  
自然超詣學者未宜過而問也顏子所樂之處實吾

心固有天地所安之處於人事無關

遺文

關

賦

關

便風俗源之意大林寺詩云天風拂  
巾袂縹緲覺身輕有蕭然出塵之意養心亭說充廣  
孟子之說以極於聖釋菜祝詞推明聖德之久以同  
乎天愛蓮說又所以使人知天下至富至貴可愛可  
求者無加於道德而芥視軒冕塵視珠玉者也

事實一編晦翁蓋集潘詵蒲礪為之其間取舍皆有意  
而復取黃太史之說終之以其最善形容有道者氣

象也義理雖備於太極通書而世或莫之能曉二程  
雖因之以發明道學而未嘗表章其書晦翁於湮墜  
混淆之餘極討論決擇之力故其於事實不過兼取  
二氏以存證而辯正尤詳於跋語然皆為周子後錄  
設也已復更端錄二程之語四章而後提通書以終  
其說或者晦翁衛道之意於斯乎在矣大抵二程本  
學乎周子而當世猶未皆知周子之道通書本發明  
太極而或者反又誤攻太極之非故錄程語者所以



證通書證通書者所以證太極圖晦翁拳拳衛道之  
意儻在於斯乎若曰推一理二氣五行之分合以紀  
綱道體之精微決道義文辭祿利之取舍以振起俗  
學之卑陋竊意該括通書莫此為要而所以警悟人  
心者至是益簡切著明矣

後錄補遺遺文凡二十二皆蜀人度正徧求於故家遺  
俗之傳梯訪於高崖危嶺之刻亦可謂忠厚之至者  
矣公之文不特詩文書帖見錄而賀傳者之名刺亦

見錄公之文所及不特親黨交游見錄而守墳之周  
興全家姓第皆見錄然則片言隻字餘音遺跡使後  
世皆寶愛之而不忘此其所本固自有在而世之富  
貴人借儒求名自為巨編以供人醬瓿之用者亦何  
愚哉

漁溪年表 先生生於真宗天禧元年丁巳終於神宗  
熙寧六年癸丑年五十七幼孤依舅氏鄭向奏補歷  
官分寧簿南安軍司理郴令桂陽令知南昌縣合州

判官通判虔州永州攝邵州事廣東運判擢提點刑  
獄以病乞知南康改葬其母乃上印分司南京二子  
壽燾後皆登第壽官至司封燾至待制先生之學傳  
二程四傳而至晦庵南軒始注釋太極圖通書以推  
大先生之學晦庵之門人度正又訪舊聞以此表附  
載孔文仲蘇文忠黃太史之稱咏而辯或者謂圖出  
於陳搏說本於老子學傳於鶴林壽涯者皆非且備  
錄魏了翁請謚臧格定謚樓觀復覆謚之文所以發

明先生推闡理學有功萬世者甚悉諡之曰元蓋嘉定十三年六月云 魏鶴山請諡二書可以成誦臧格發明諡元之意其用工於先生之學甚深非世俗文人可及特恐末後稱潘興嗣何人敢誌其墓頗覺抑揚之過耳昔孔子歷聘天下從遊三千然非後世子思孟子則不能發明其盛蓋陽之暢也暮春日之顯也中天下事未有不待乎久者周子之學雖傳於二程寔顯於晦翁凡今世之能言周子者皆晦翁

緒餘也而可責潘興嗣之知周子不能如今日乎且潘不特誌先生之墓也先生母夫人之墓寔先生請其誌竊計先生平日之所敬寔無以加於潘如蒲宗孟雖一時聞人而其為先生之墓碣晦翁不之取而取此竊計晦庵所取以證先生之圖說者亦無以加於潘自古有道士湮沒無聞於世者多矣豈可以潘之功業不見於世而輕加詆訾且不特圖也濂溪在當時亦何嘗如今日之顯顯其曰善談名理此亦

正言先生之實太極二氣五行之說此正名理之深者亦不可以名理二字晉人嘗有之而例以為非且其言曰作太極圖易說易通數十篇作之一字鑿鑿然可知此圖之創出於先生潘乃先生平日交游之舊所載無非寔錄近世誤攻太極圖者惡潘誌之害已也故鄙潘今尊信太極圖者亦從而鄙潘耶藉曰以誌屬潘為出於先生子弟以母夫人誌屬潘者寔出於先生又果何說耶定諡之文知先生者也惟斥

潘一語乃與晦翁相反愚故不容不言之若覆議援  
王通太極合德為言且曰夫子生於晚周果何與乎  
太極此與周子之說不同則不必言可也

附錄

潘誌語平意密蒲礪若視先生為物外人所載稱美熙  
寧新政之家書當是先生望治之寔意蒲非敢誣也  
前輩疑之盖見新法既壞為賢者諱耳

邵州復學靜江祠堂廣東憲司祠堂皆南軒為記

晦翁記先生江州書堂以天所昇為說曰不繇師傳默  
契道體建圖屬書根極要領嗚呼大哉言乎其記韶  
州祠堂之說曰有以聞夫太極陰陽五行之奧而天  
下之為中正仁義者得以知其所自來其記隆興祠  
堂之說曰所謂太極云者合天地萬物之理而一名  
之耳以其無器與形天地萬物之理無不在是故曰  
無極而太極以其具天地萬物之理而無器與形故  
曰太極本無極其記邵州祠堂則舊以張九成侑祠



而更闢以特祀其記袁州祠堂則以胡文定魏掞嘗  
請祀二程而未及先生其記婺源祠堂則欲人讀其  
書求其指以反諸身而力行之南軒之為記多言其  
發端之功西山真氏之為記多言其講明性道教之  
功鶴山魏公之為記多考訂古義以詆其師為非古  
且痛惜學者徒尚虛文而不能行若夫先生之譜系  
鄉井祠堂本末則龔維藩之記為詳凡集此者皆度  
正云

程氏遺書

卷一 盖李顥字端伯所錄而伊川嘗謂得其意者 二  
初 吕與叔從張橫渠張死而入洛所謂東見錄也 附東  
見錄亦與叔所記 三 謝顯道記憶平日語 四 游定  
夫所錄 五 六 七 八 九 皆不知姓氏 十 洛陽議論蘇  
昞錄 十一 劉絢質夫錄明道語 十二 劉質夫錄明  
道語 十三 十四 皆劉質夫錄明道語 十五 關中學  
者錄伊川語 十六 已巳冬所聞不知何人所記 十

七亦不知何人所記或云周行已或劉安節皆永嘉人  
程氏發明孔孟正學於千四百年無傳之後微言與  
旨特散見於門人之集錄賴朱子起而搜逸訪遺始  
克成編其尤切於日用者已類而為近思錄矣然朱  
子之錄近思必丁寧學者更求之全書及考其所編  
全書乃稱伊川自謂惟李籲得其意故以為首篇且  
反覆詳論謂失之毫釐則其繆將有不可勝言者然  
則學者之讀遺書全編其又可不謹乎自今觀之孔

子夢周公一也張繹所錄則謂晚年不遇不復夢見  
鮑若若所錄則謂若曾夢見大段害事夢周公何害  
事之有殆惑於異端真人無夢之說耳是鮑之錄不  
若張之近人情賜不受命一也游定夫所錄則謂不  
受天命不知姓氏所錄則謂不受爵命子貢蓋嘗結  
駟鄰國矣何嘗不受人之爵命是或者之錄不如游  
之得事實乾坤六子之說一以為乾坤退處而用六  
子一以為六子之用即乾坤是甲之錄不若乙之通

養生延年之說一以為人力可勝造化一以為天命不可損益是前之錄不若後之確善惡之判曉然也錄者謂惡亦不可不謂性又謂天下善惡皆天理此雖窮極底蘊之辭然恐不若直言擇善之為經鬼神之事難明也錄者謂風肅然起於人心之怖畏又謂雷擊人起於惡氣之相觸此雖曉諭世俗之辭然恐不若泯於忘言之為得謂以心知天為未然而謂心即是天固於知天之上加通徹矣若夫謂道不可離

為未然而謂道豈有可離不可離何其蕩無繩墨也  
此暢潛夫之錄朱子注其多非先生語歟以至誠贊  
天地為未足而云同此一誠何助之有固於天地聖  
人之誠加混合矣若夫謂謹禮者不透可讀莊子何  
其矯枉過正也此劉元承之錄朱子又注其為別本  
所增歟洒掃應對與佛家默然處合此殆言工夫之  
始耳程子平日之言本斥佛學之無用而謂吾儒自  
洒掃以上便是聖人事也敬其心不接視聽此殆指

收歛之極耳程子平日之言本主視聽之以禮而斥  
禪學之絕耳聞目見為喪天真也大抵孔孟之學大  
中至正之極而二程之學正以發明孔孟之言不幸  
世之黠者借佛氏之名售莊列之說蕩以高虛舉世  
生長習熟於其間而不自知聞程子之說稍不加審  
則動必陷入於彼今欲辨程錄之真偽無他亦觀其  
於孔孟之說相合或於莊列之言相似與否耳程門  
高弟才莫過於謝顯道何其所錄程說之可疑亦莫

多於謝顯道耶第一條所錄以鳶飛魚躍為活潑潑活潑潑何等語求之孔門惟見其云君子之道造端夫婦耳第二條言切脉第三條言觀雞雛而皆指以為仁切脉觀雞殆於機觸神悟求之孔子惟曰居處恭執事敬而孟子亦以惻隱為仁之端耳謂堯舜之事如太虛中一點浮雲過目何其與四海困窮天祿永終之成異也謂與善人處壞了人何其與母友不如已者之意殊也謂莊生形容道體之語為儘好謂



老氏谷神不死一章為最佳此殆其本心之形見而  
記憶其師平日之言亦粉澤於其所學自成一家之  
後矣揚子雲有言適堯舜文王為正道非堯舜文王  
為他道愚亦謂合於孔孟者程錄之真異於孔孟者  
程錄之誤

道與德為虛位

老子貴道德而賤仁義吾儒即仁義而為道德此毫  
芒疑似之間韓子將辭而闕之亦難乎其言矣故曰

道有君子有小人德有凶有吉而道德為虛位若曰道德之名一也而寔不同儒者以仁義而居之則道為君子之道而德為吉德老子舍仁義而欲居之則道乃小人之道而德乃凶德耳其立辭之精措意之工剖析是非之要切似未有過於虛位之說也程錄非之豈亦門人之誤與合俟知者而請焉

周亞夫軍夜驚

軍夜驚而亞夫不動善矣程先生以為軍猶驚何耶

亦未得為盡善愚謂小人羣睡偶有驚魘而衆随之  
此類多有乃出不測亞夫能使身之不動安能使人  
之不驚若行軍而有驚擾則可責主帥之未善耳古  
人倉卒處變難能之事後世平居暇日加求全之毀  
若此類甚衆如程先生特借此以明事理之極耳後  
學未易輕言也

遺書附錄

明道先生行狀

高祖羽少師曾祖希振虞部祖適贈開府父珣太中  
先生生而秀異未能言能指金釵墜處十歲能詩賦  
彭思永許妻以女中進士第主鄆縣簿南山石佛歲  
傳其首放光先生成其僧俟復現當取其首就觀之  
自是不復有光再調上元均田稅塞潰提云一命之  
士苟存心愛物於人必有所濟見人黏飛鳥取其竿  
折之移普城令教以孝弟忠信為監察御史裏行與  
荆公議不合求補外差京西提刑辭改鎮寧軍判官

屢平反重獄塞曹村河決監京西竹木務知扶溝事  
除焚舟之賊朝廷除田稅獲除者皆頑民先生為約  
前料獲免者今必如期而足於是惠澤始均爭王中  
括牧地曰民徒知今日不加賦不知後日增租奪田  
則失業矣監汝州酒稅哲宗嗣位召為宗正丞未行  
以疾終先生少從周茂叔辨異端似是之非開百代  
未明之惑謂孟子沒而聖學不傳以興起斯文為已  
任子端慤端本

明道之歿伊川狀其行求銘於韓持國而文潞公題其墓伊川歿洛人畏黨禍送喪惟四人曰張繹范域孟厚尹焞又薄暮出城乙夜方至者為邵溥迨晦庵朱先生始訪其事為年譜云

程氏外書

朱公揆錄拾遺大率言詩多於字上求意物上求義其於一之日二之日不謂變月言日云猶今之道如何又如何此說亦異於衆

陳氏本拾遺多說論語其合錄者已見晦翁集註

李參錄拾遺以望道未見為望治道太平恐於本文有

增

馮本拾遺云王輔嗣韓康伯只以莊老解易又云論孟  
只熟讀便自意足愚謂此皆切當之語與他錄有疑  
似者不同

羅氏本拾遺云文意雖解錯而通理者不害

胡氏本拾遺溫公欲盡去元豐間人程子謂侯仲良曰

若宰相用之為君子孰不為君子此等事教他門自  
做未必不勝如吾曹尹子親注云此段可疑蓋意其  
非程子語也然邵氏聞見錄亦載伯淳與韓宗師語  
云當與元豐大臣同若先分黨與他日可憂則胡氏  
本所載未可以為疑也豈程氏自有此論尹子鑒後  
來調停之禍而疑之耶然自古亦未有君子小人共  
事而可成功者第惟伯淳自足以服熙寧諸人之心  
必又有所以處之之道耳



侯師聖以明道先太中而卒故立廟自伊川始以伊  
川子端參主祭

游氏本拾遺王者天下之義主也孟子所以勸齊之可  
以王

春秋錄拾遺謂書母弟為害義禽獸則知母而不知父  
人豈論同母與不同母乎謂蒯聵委於所可立使不  
失先君之社稷而身去則義矣

大全集拾遺謂周禮不全是周公之理法 天下寧無

魏公之忠亮而不可無君臣之義余謂此極論也然  
忠字合作鯁字 先生未嘗乘轎云分明以人代畜  
愚謂此佛氏之戒為佛者皆犯之吾國之貴者老者  
恐不可免餘當以先生為法 謂釋氏之說其歸欺  
詐始以世界為幻妄而謂有天宮後亦以天為幻而  
卒歸之無佛有髮而僧復毀形佛有妻子舍之而僧  
絕其類至如夜食後睡要敗陽氣其意尤不美直如  
此奈何不下愚謂以此責異端皆事實彼亦心服

時氏本拾遺或問劉蕡曰尺蠖之屈以求伸也踈遜小  
臣一旦欲以新間舊難矣教人者養其善心而惡  
自消治民者導之敬讓而爭自息

按此卷可疑者在首章謂老子言天地不仁以萬  
物為芻狗之說為是

傳聞雜記

明道嘗曰天理二字却是自家體貼出來愚按樂記已  
有滅天理而窮人欲之語至明道先生始發越大明

於天下

伊川謂鑄銅錢寧虧本則盜鑄息賣官鹽寧減價則鹽課增又謂溫公變法未可動後法動即三五年不定其後無一不驗

伊川歸自涪見學者多從佛學嘆曰惟有楊謝二君長進嗚呼亦豈料其他學者之從佛未足以惑世而他日之從佛能動人者正今日之楊謝耶

伊川嘗言今日之禍亦是元祐做成愚謂理亦有此但

諸賢一時為天下救急有奈何恐不可赦小人而  
反責君子耳豈責備果春秋意耶然無元祐諸賢恐  
不待靖康而後南渡雖南渡又未必人心之戴宋如  
此

伊川與韓持國友善見即久留因子弟進以黃金櫟二  
十兩詰朝遂歸

謂孟厚不治一室學不在此洒掃潔淨莫更快人

仁宗以折米六分太甚止令折五分及供進偶臙臍曰

習使然也仍令如舊又進飯有砂石含以示嬪御令勿語人此死罪也生荔枝供盡近侍欲買之云買之來歲必增上供之數流禍百姓無窮又一日夜飢思燒羊頭近侍乞宣取曰取之後必常備日殺三羊暴殄無窮竟夕不食凡皆明道云然嗚呼仁哉

伊川云若熟看語錄亦自得愚謂此當與伊川稱某在安用語錄之說參考

伊川與堯夫同里巷三十年世間事無所不論未嘗一

字及數學愚謂卓哉人豪乎為士大夫而欲攻伎術者可以觀矣

程氏經說

書解 史所謂大道說有羲皇之書乃許行謂神農之言陰陽醫方謂黃帝之說此聖人所以去之常道亦去其三蓋為治有迹有史官以志自堯始耳

事之最大在推測天道以授人時既已迎日推測之復考中星以正四時其法明而易準其它廢事總云

允釐百工

謂繇之惡公議隔而人心離

納大麓為總錄庶政愚意恐合依文公說

詩解 摘篇全解發明義理為多惟託興上求義處恐太寔耳

赤芾三百言其多爾曹國之小安得有三百之多左傳乘軒者三百人因此詩也

朋酒朋聚以饗



鉦人擊鉦者伐鼓擊鼓者

箴如鍼砭之刺病

文王侵廣土疆自阮始至于岐隴高山皆有之愚謂  
皇矣詩人紀寔之言伊川平心之說也近世形容文  
王無此事是待之過高而曲為之辭其源發於歐公  
之秦誓論

春秋傳序原鴻荒至漢唐世變辭約義精善言春秋  
者孟子之後惟先生一人而已傳至桓公九年餘以

先生平日議論嘗及者附足之

謂周正月非春也建子言春者假天時以立義耳愚  
按此亦舊說必程先生不欲輕改然有可疑者蓋若  
謂冬為春則人事與天時皆不合或者建寅為正正  
月為春古今所不可易所謂改正朔云者不過各於  
其所稱歲首月朝聘祭饗以示更新如商之建丑十  
二月也書稱惟元祀十有二月未嘗改十二月為正  
月漢初建亥十月也漢史亦書冬十月未嘗改十月

為正月以此而推春秋之春正月恐即自古及今之  
春正月安得以十一月為正月而又就以十一月為  
春耶且詩作於周如四月維夏六月徂暑七月流火  
九月授衣無非夏正月令一書作於周末十二月之  
間中星候蟲亦無一不用夏正惟孟子稱七八月之  
間旱世指為夏正之五六月然禾稼早晚所至不同  
今江浙間十月穫稻而七八月間苦旱者甚多如十  
一月徒杠成十二月輿梁成殆亦冬寒而濟涉耳惟

小戴禮之雜記有曰正月日至可以有事於上帝若可疑者然此書出於漢儒恐因周以建子為歲首遂追稱正月未可知漢改正朔兒寬等議曰帝王必改正朔至不相復推傳序文則今夏時也此其證矣姑舍是而春秋言之春秋書秋八月大閱時也今因以八月為六月遂曰盛夏大閱妨農害人書冬十月雨雪亦時也今因以十月為八月遂曰建酉之月未霜而雪此類安知非經文本用夏正不過據寔而書耶

至若當時書法亦豈後世之所能盡知先生亦因自  
昔凡例之說而載之耳若書王於桓之元年曰以其  
弑立故正以王法於二年曰以宋督弑立故正以王  
法於三年不書王則曰以桓無君故不書恐亦隨事  
意之耳夫弑立尤無君之大者也向使元年二年不  
書王則併為其無君而不書亦豈不可乎如書即位  
於隱莊曰不正其始不書於閔僖亦曰不正其始不  
書於桓宣定之書即位則以為弑君而自立故書恐

亦隨事意之耳若以不正其始者不書即位則三君  
尤為不正始之大者又反可書乎桓之有年宣之大  
有年恐皆慶事之不容不書爾若曰桓宣不應有而  
有之故書其異將治世永無水旱而亂世常必飢歉  
乎有年既以異而書則水螟無禾麥之類當為春秋  
之常何為而亦書之他若侵伐必曰責常在彼侵伐  
者書入亦曰責在受其入者其說以為上不能告之  
天子下不能告之方伯而私與之戰也然古之天下

難以後世兼制天下之事逆之也彼諸侯者非郡縣  
比各土其土各民其民有王者作不過以禮相與王  
室一衰即勢不行周既東遷自保不暇豈能復命方  
伯以討不軌使小國見侵於鄰不與之戰而待上告  
天子下告方伯則茫如訴之鬼神國已奄忽為墟宗  
社之祀絕矣且世有倉卒被寇者救禦惟恐不亟乃  
責其不以聞官府而私自逐寇揆之人情恐亦未必  
然嘗謂春秋大義如尊王賤霸崇仁義而賤功利尊

中國而外夷狄此先生所謂炳如日星者蓋天下萬世綱常之所賴其餘微辭奧義豈易推測自昔春秋家凡例之說豈易一一為之辭惟平心易氣隨其事而讀之善惡自見而勸戒存矣

論語 自學而止子罕麻冕章皆先生所作論語說辭約義精多晦翁集註所取為據者自後乃其平日議論所及 孟子止盡信書一章亦議論云

禮記 明道改正大學以康誥曰以後釋明字新字止



字者聯首章明德新民止至善之下然後及古之欲  
明明德一章以所謂誠意以後節節釋之伊川改正  
大學則移古之欲明明德一章於康誥曰之前

程氏文集

明道表疏 明道事神宗初疏乞定君志用正人次乞  
修學校尊師儒次論王霸皆根本之論其要尤纖悉  
於養士養賢之節目意者亦念人情之不古伊欲變  
化士習非徒法之所能行故先以君志而後及之歟

有曰禁衛之外不漸歸之於農則將貽深慮竊謂譬  
之於疾此尤劇証人主所宜力救者也其乞留張載  
免往明州推勘苗振公事云朝廷以儒術進人而以  
獄吏之事試之則抱道修業之士益難自進矣其諫  
新法二疏云與其遂一失而廢百為孰若沛大恩而  
新衆志又云設令僥倖小成而興利之臣日進尤非  
朝廷之福其議論得大體如此

答橫渠定性書略云所謂定者動亦定靜亦定天地之

常以其心普萬物而無心聖人之常以其情順萬物而無情故君子之學莫若擴然而大公事至而順應夫人之情易發而難制者惟怒為甚第能於怒時遽忘其怒而觀理之是非亦足見外誘之不足惡而於道亦思過半矣

試策問春秋專主唐陸淳得啖氏之說曰紀師無曲直之辭一之也不一則禍亂之門闢矣謂禘為王者之祭非周公之志餘若書鄭伯之克謂克下之辭明君

臣之義書次於郎言非有俟而次則已將為賊爾

明道詩皆造化生意之妙較之堯夫擊壤集則堯夫為

自私其樂者矣

戶部侍郎彭公思永行狀先生外舅也公八九歲得金  
釵伺訪者還之海水敗台州公以睦州倅往撫之築  
城為永利為湖北漕黜守令各一人而八州知畏至  
蜀治二盜而人畏法初為御史論濫恩後拜中丞助  
蔣之奇言大臣陰私罷

程郎中璠通判和州刑蔡之妖尼惠普移温州置神恠  
李洞元者於法

幼女澶娘病豆瘡以藥利之死

邵堯夫先生墓誌銘 先生始學於百源堅苦刻厲冬  
不爐夏不扇夜不就席者數年復走吳適楚過齊魯  
客梁晉久之而歸曰道其在是矣及其益老玩心高  
明觀於天地之運化陰陽之消長達乎萬物之變然  
後頽然其順浩然其歸其與人言必依於孝弟忠信

樂道人之善而未嘗及其惡

華陰侯先生誌銘 先生名可以氣節自喜從孫威敏  
公征儂智高得官熙河未開為韓魏公馳諭渭源酋  
豪開地八千頃秦州舊苦蕃酋反覆繫其親愛先生  
謀佚而歸之戎人感服二程其甥云

伊川十八上仁宗書謂應時而出自比諸葛及後應聘  
為哲宗講官則自講讀之外無他說不特其時至慮  
易而然蓋時與位既不同而哲宗尚幼惟以培養為

急耳其他論濮議論薄葬代呂公著上神宗書無不深切著明然則天下事非得其位當其可則固未易輕言也若三學者詳反為禮部所駁則本朝文密之弊固難與俗吏言久矣

顏子所好何學論謂其學以至聖人之道養魚記蓋因物感人飲楔詩序謂以好賢方逐樂之心禮義為踈曠之比道藝當筆札之工誠不愧矣

論賑濟令宿戒晨入午與食申出之日得一食則不死

力能自營一食者不來當活數倍羸弱者稀粥分給  
氣定然後一給飯粥須親嘗恐入石灰

蔣堂守蜀衆所不樂者三事減邀樂毀淫祠伐江濱廟  
木修府所謂衆不善者乃可謂最善者也

視聽言動箴在由中應外制外養中兩語

伊川為家君請字文中允典漢州學書謂講明聖人之  
道開道後進使其教益廣其傳益廣故雖身隱而道  
光跡雖處而教行出處雖異推已及人之心則一也



答橫渠書 有苦心極力之象無寬裕溫厚之氣更願  
完養思慮涵泳義理他日自當條暢

代富公奏謂昭陵壙中為鐵罩重且萬斤以木為骨大  
止數寸不過二三十年決須摧毀願奉太后合祔因  
得徹去鐵罩

答朱長文書勸勿多作詩文

上韓持國求為明道誌述云相知者雖多能知其道則  
鮮有文者亦衆文足以發則鮮能言者非少足以取

信則鮮

答楊時書朝廷設教官蓋欲教人修身齊家治國平天下之道

婚禮六納采者謂壻為女氏所采問名者問所娶女子之名納吉者謂卜得吉兆以告納徵者用皮帛以證成娶婦之禮請期者實告婚期成婚者告迎於廟葬法決疑堪輿經黃帝對天老乃有五姓之言且黃帝時只有姬姜二三姓所謂五姓者宮商角徵羽以同

韻相求至以柳姓為宮趙姓為角又非四聲相管亦  
有一姓分屬宮商復姓數字徵角不辨夫姓之於人  
因邑因官若用祖姓則數經更易若用今姓則皆後  
代所受是吉凶隨時變易也葬者逢日食則舍於道  
左而葬書用乾艮二時皆是夜半又曰巳亥日葬凶  
今按春秋此日葬者二十餘人皆無其應

先太中嘗知龔鳳磁漢四州歷官十二任享祿六十年  
廉謹寬和孜孜夙夜年七十致仕自為墓誌壽八十

五子孫就其缺處加所遷官爵晚生諸孫及終葬月  
日云

太中家傳太中弱冠寓黃陂奉養諸母教撫弟妹以口  
衆不能偕行不赴調文簡公為請於朝就注黃陂尉  
至長弟與從弟皆得官娶婦二妹既嫁乃赴調後知  
龔州投歐希范之神於河知沛縣遇水募布豆水中  
水未盡涸而甲巳露遂不艱食有自稱僧伽弟者杖  
而出諸境知磁州水漸成花卉之狀郡官請以上聞

公曰石晉之末嘗有此知漢州吏白殺青而文見公  
不應衆呼佛光見公不動新法行抗議移疾五得任  
子以均諸父子孫

上谷郡君家傳 好讀書史博知古今不喜宮朴奴婢  
視小臧獲如兒女諸子或加呵責必戒之曰貴賤雖  
殊人則一也汝如此大時能為此事否聚族甚衆人  
皆有不欲之色乃別糴以食之嘗大寒有負炭而擊  
者家人欲呼之夫人曰慎勿為此勝則貧者困矣先

公有所怒必為之寬解惟諸兒有過則不掩常曰子之所以不肖者由母蔽其過而父不知也行而或踣曰汝若徐行寧至踣乎嘗絮羹曰幼求稱欲長當如何與人爭忿雖直不右曰患其不能屈不患其不能伸在廬陵公宇多怪家人告曰物弄扇夫人曰熱爾又曰物擊鼓夫人曰有椎乎可與之後家人不復言怪亦不復有願兄弟幼時夫人勉之讀書並書一行前曰殿前及第程延壽次曰處士知之童穉中矣

自孔孟歿異端紛擾者千四百年中間惟董仲舒  
正詛明道二語與韓文公原道一篇為得議論之  
之正迨二程得周子之傳然後有以窮極性命之  
根柢發揮義理之精微議者謂比漢唐諸儒說得  
向上一層愚謂豈特視漢唐為然風氣日開議論  
日精濂洛之言雖孔孟所未發特推其旨要不  
越於孔孟云耳然孔子於性理舉其端而不盡言  
或言之必要之踐履之寔固可垂萬世而無弊自

心性天等說一詳於孟子至濂洛窮思力索極而至性以上不可說處其意固將指義理之所從來以歸之講學之寔用適不幸與禪學之遁辭言識心而見性者雖所出異源而同湍激之衝故二程甫歿門人高弟多陷溺焉不有晦翁孰與救止嗚呼危哉故二程固大有功於聖門而晦翁尤大有功於程子

伊川至論



伊川至論者紹興六年四月建陽施孫碩所序而麻沙  
鎮刻本也余為兒童時見先君子手書伊川先生常  
語六字於帙面而口授大指於余余時未能盡曉也  
近歲宦學四方盡收伊洛諸書日加點勘乃無伊川  
至論之目因遠取於家山之萬松庵而參校之其書  
凡十二卷其一曰語錄首以性靜可與為學之一條  
今於晦翁所編程氏外書朱公掞拾遺一卷見之其  
二亦曰語錄首以綏之斯來動之斯和一章今於晦

翁所編程氏遺書第十一卷之中至十二三十四  
卷見之其三亦曰語錄自第六條鳶飛魚躍之語於  
遺書第三卷謝顯道所錄見之四卷至六卷則散見  
今遺書中而第七卷載周子通書綴以太極圖圖與  
通書合而為一足證晦翁之說而解陸氏之疑但通  
書中明通公溥作明通行傳云靜虛則明明則通動  
直則行行則傳又太極圖初圈象無極而太極者其  
下注陰靜字第二圈象陰陽交互者其下注陽動字

太極說之起處亦缺四字如太極動而生陽太極字  
止用之字靜而生陰靜字亦用之字恐太極字連綴  
上文之太極靜字亦連綴上文之靜元本用二畫連  
綴而二畫之二字與之字相近故傳者誤作之耳第  
八卷載漁樵問答蓋世傳以為康節書者不知何為  
亦勦入其中兼近世昭德先生晁氏讀書記以此書  
為邵伯溫偽作今觀其書惟天地自相依附數語為  
先儒所取餘多鄙俗其伯溫得家庭之說而私附益

之明矣第九第十皆曰河南語錄與今遺書第十一  
卷劉質夫所集師訓多同十一十二皆曰入關語錄  
與今遺書第十五卷入關語錄亦同若其第一第二  
卷說詩說易亦於外書拾遺中間見

余按程氏之書晦翁搜括大備拾遺之外又錄傳聞  
雜記者二十家今至論一書集於晦翁之前而刻梓  
亦出於晦翁之寓里晦翁安得反獨不見亦安得見  
而反獨不言是未可知也竊意晦翁未集遺書以前

此書殆為程門大備之書兼施孫碩之序此書有曰  
孟氏之後獨伊川以孔孟為師以正心誠意為本體  
之足以修身事親推之足以致君澤民學者能深求  
其旨而篤信之亦趨聖域之徑路所論若此又豈近  
世談虛空與事文墨之士可望其髣髴故記其與遺  
書畧異者以俟知者問焉

橫渠正蒙

氣塊然太虛升降飛揚未嘗止息鬼神者二氣之良能

太和篇

地純陰凝聚於中天浮陽轉旋於外日月五星逆天而行  
天并包乎地地在氣中雖順天左旋其所繫辰象隨  
之稍遲則反移徙而右月陰精反乎陽故右行最速  
日陽精質本陰故右行雖緩亦不純繫乎天金水附  
日進退而行存乎物感鎮星地類然根本五行雖行  
最緩亦不純繫乎地火比日而微故其遲倍日木乃  
歲一盛衰故歲歷一辰

地有升降日有脩短此一歲寒暑之候至於一晝夜之  
盈虛升降則以海水潮汐驗之

月於人為近日遠在外故月受日光常在於外

參兩篇

愚按造化難測橫渠思索最精辰象隨天而遲反  
成逆行此理於雲運月駛可驗

動物本天以呼吸為聚散之漸植物本地以陰陽升降  
為聚散之漸物之初生氣日至而滋息物生既盈氣  
日反而游散

賢才出國將昌子孫才族將大

動物篇

愚按賢才出子孫才亦氣日至而滋息之類也

性者萬物之一源非有我之得私大人能盡其道故立必俱立知必周知愛必兼愛成不獨成

形而后有氣質之性善反之則天地之性存焉故氣質之性君子有弗性焉

陽明勝則德性用陰濁勝則物欲行

並誠明篇

愚按論性之廣大無如萬物一源之語論性之精



切無如氣質弗性之語陽明陰濁分別尤淨

不得已而後為不得為而止斯智矣夫

中正篇

愚按此卷有大心篇語雖驚人本旨欲以心體萬物則於小心之義自並行而不相背至謂夫子惜顏回未得所止未知經意果如何恐亦是進而不息之義耳

言有教動有法晝有為宵有得息有養瞬有存

聚百順以事君親不慙而多能譬之豺狼不可近

有德篇

右六卷七卷中精語也六卷說論語八卷說易九  
卷說詩說禮間與近世諸儒之說未合似有思之  
太遠者

浮屠說熾傳中國使英才間氣生則溺耳目怙習之事  
長則師世儒宗尚之言遂冥然被驅因謂聖人可不  
修而至大道可不學而知上無禮以防其偽下無學  
以稽其弊自古設淫邪遁之詞翕然並興一出於佛  
氏之門者千五百年自非獨立不懼精一自信有大

過人之才何以正立其間

右乾稱篇

愚按乾稱篇始於西銘終於東銘至若闢邪說則此章極為痛哉然學者至今無一以為然良由不學不思耳悲夫流俗之陷人如此哉

橫渠理窟

周禮盟詛之屬必非周公之意

周禮篇

愚按周禮豈獨盟非周公之意哉盟詛出於後世則周禮恐未必盡作於周公橫渠好古之切故為

委曲回護如此而又以詩書次周禮焉

宗子之法廢則朝廷無世臣今日大臣之家且可行宗

子法朝廷有制曾任兩府則宅舍不許分

宗法篇

愚按此意厚矣然古者諸侯卿大夫以世襲故其法易行且以防僭奪故其法最當嚴耳

學者先須去客氣先須溫柔此皆變化氣質之道宜矯

輕警情常游心義理之間

氣質篇

愚按理窟一書惟氣質篇最於學者有益

心苟不求益雖與仲尼處何益

氣質篇

心不在焉雖學無成學須深沉非淺易輕浮之可得

義理

篇

讀書則此心常在

義理篇

今世學不講男女從幼便驕惰壞了長益凶狠只生來  
未嘗為子弟之事

某書多使氣後來殊減更期一年庶幾無之如太和中

容萬物任其自然

學大原

愚按以上皆示學者緊切處

心清時常少清時即視明聽聰四體不待羈束而自然

恭謹

心不可勞當存其大者

心洪放如天地易簡然後能應物皆平正

學大原

愚按此皆先生養心用工處無靜坐把捉之苦最

可法舍此而言心則易入禪學

衆人皆合安得不合

天下大患只畏人非笑不養車馬食粗衣惡居貧賤皆  
恐人非笑不知當生則生當死則死今日萬鍾明日  
棄之今日富貴明日饑餓亦不卹惟義所在

自道

愚按安得不合和也不畏人非笑自立乃如此

### 橫渠語錄


為天地立心為生民立極為往聖繼絕學為萬世開太  
平

學禮則除去世俗一副當習熟纏繞便自然脫灑

橫渠先生精思力踐毅然以聖人之事為己任凡  
所議論率多超卓至於變化氣質謂形而後有氣  
質之性善反之則天地之性存焉故氣質之性君  
子有弗性焉此尤自昔聖賢之所未發警教後學  
最為切至者也學者宜何如其遵體哉若夫篤信  
周官謂可舉行於今日則未知先生見用果何如  
似恐世變推移自昔聖人亦不過隨時立制而治  
要亦不在制度之細爾至若測陰陽造化談清虛



一大初學未當過而問不敢盡抄類云



黃氏日抄卷三十三

欽定四庫全書

子部

黃氏日抄卷三十四

詳校官中書

臣康綸鈞

刑部郎中

臣許兆椿覆勘

總校官進士

臣楊懋珩

校對官監丞

臣張曾炳

謄錄監生

臣李金玉

欽定四庫全書

黃氏日抄卷三十四

宋 黃震 撰

讀本朝諸儒理學書二

晦庵先生文集一

詩賦

桂林虞帝廟樂歌迎之章三一章思其所安在而後迎  
送之章三一章極其所往而猶思文法高妙語意無  
窮其曰渺冀州兮何有而應之曰暢威靈兮無外慨

然斯世之意所寄焉者也

白鹿洞賦一章言唐李渤讀書舊地而南唐因創書院  
二章言自太宗真宗增闢而廢於熙寧三章言今日  
之再造四章言講學之要領而亂之以德業無窮之  
思

感春賦空洞賦皆用騷體而無其愁思寄興悠遠矣

招隱操蓋謂淮南小山初作本招隱者而使之仕後世  
皆失此意故再為申其旨又為反招隱言道誼自得

之樂時止時行無入而不自得也

遠游篇指要在願子馳堅車之句

誦佛經詩云聊披釋氏書結之曰了此無為法身心同  
晏如又讀道書詩終朝觀道書繼之曰於道雖未庶  
已超名跡拘先生之博覽旁通蓋如此然有先生之  
識則可無先生之識則惑也且此皆初卷詩多少年  
時所作晚歲論語集序自悔昔者吾幾陷焉豈謂此  
時此類與不然先生他日謂昌黎自說與大顛交此

是昌黎平生死案何嚴也近世流弊浸淫凡言吾儒者多陰用異端之說甚者昌言異端之不可廢而自貶吾儒之不及恐又誤指先生初年之詩為證故書至日詩自叙頃以多言害道絕不作詩而詩末句云行迷亦已遠及此旋吾輟此悔心也然以先生晚年之學謂漫辭為虛費工夫則可若言以明道雖多何害耶

仁術與文善決江河詩全用進士省詩體

西林再題謂向來妙處今遺恨萬古長空一片心此亦  
非先生晚年之學

汲泉清竒石詩末句云慨然思古人尺璧寸陰重觀詩  
至此喚醒多處

梨名快果注云出本草

黃雀鮓詩坐以食稻果之罪蓋戲為口腹解嘲耳豈亦  
有所指而言之耶

感興詩二十首轉陳子昂自託仙佛之高調而為切於



日用之實一章言伏羲肇人文皆造化自然之理二章言陰陽無始謂鑿死混沌者為妄三章言人心與造化通惟至人能體之四章言不能體造化者為形役五章言周衰已久孔子作春秋而司馬公乃責後世封大夫為諸侯非先見六章言漢衰獨孔明伸大義而帝魏之失當草七章言唐啓土不以正而致賊后之篡賴范太史聲其罪八章言陰陽常倚伏當體陽復之端九章言北辰居其所當體為人心之要十

童言聖人刪詩定書皆以敬為傳心之本十一章言  
伏羲仰觀俯察以立象十二章言六經無傳而程氏  
作十三章言顏曾子思孟子傳有要領十四章言元  
亨利貞之動靜以誠為主十五章言學仙者逆天偷  
生十六章言佛論緣業而繼之者談空虛十七章言  
育材失其道十八章言作聖當自早十九章言仁義  
之心當守二十章言文辭之弊當除

卜居喜雲谷之成

六經說命篇始有學字見奉答景仁詩注

拜張魏公墓下自此皆訪南軒登南嶽之詩凡五十三  
首既別而歸沿途凡九十四首既歸懷南軒者復數  
詩

觀洪遵雙陸譜詩云近從新譜識梟廬擬喚安陽舊博  
徒只恐分陰閒裏過更教人誚牧猪奴盖用陶侃樗  
蒲者牧猪奴戲之語譏之深矣頃余會京口有蜀人  
袁象湏舉林和靖語云平生所不能檐矢與圍碁余

因謂博之與弈其廢時亂日一也吾夫子云為之猶  
賢乎已者正借無益之事以甚言無所用心之為害  
非真謂博奕之猶可為也陶威公與林和靖之說殆  
天生自然之對因合之為四句曰雙陸牧猪比圍碁  
擔矢同二公皆妙語千載仰高風繼又反之為四句  
曰牧猪滋畜養擔矢溉禾蔬博奕何為者猶疑反不  
如

公濟勉以教外之樂先生答詩云如云教外傳真的却

是瞿曇有兩心就渠所嗜處喚醒此納約自牖之義也愚平生謂禪學為異端之異端鑿空無據自號教外正其自納敗缺處然未有可余之說者今見先生詩庶以自信

雲谷諸詩先生寫幽居自得之樂其云天道固如此吾生安得寧自言不息之功如此幽居云乎哉

聞雷詩誰將神斧破頑陰地裂山開鬼失林我願君王法天造早施雄斷答羣心讀之令人感動豈為龍大

淵革發耶

南康往回詩其出游南康之陽白鹿洞折桂院

李逢吉讀書處

李氏山房

李公擇讀書處

棲賢院西澗臥龍庵

武侯祠

萬杉寺

天聖旨禁剪伐

開先寺簡寂觀歸宗寺陶公醉石溫湯康王

谷水簾落星寺其歸游山之北圓通寺石門寺天池

院佛手岩

天池院有清燈處先生親見光景明滅隨刻異狀

東林西林

白蓮池在

東太平興國宮

慧遠取孔老言著沙門不敬王者論明皇謂見九天使者降因立此宮

訪瀟溪宅講太極圖而別同游者

游白鹿洞詩云不及楊李霸謂南唐興書院事

武夷精舍詩武夷溪九曲多湍激獨第五曲平廣而最深大隱屏臨其上屏下兩麓相抱先生淳熙癸卯卜築其間堂曰仁智堂左曰隱求右曰止宿左麓之外復引而右抱為塢曰石門別爲屋其中曰觀善齋以居學者石門之西少南曰寒棲館以延道流觀善前山之顛為亭四望大隱屏曰晚對東出臨溪為亭曰鐵笛而總扁麓之口曰武夷精舍釣磯茶竈皆在大

隱屏西溪左右皆石壁無側足之徑又為漁艇以濟  
出入各賦一詩凡十二篇又別為權歌十章詠九曲

云

古之蕙即今所謂零陵香出秋華詩注

第十卷詩多致仕後作樂府附焉

封事奏劄講議

壬午應詔封事 孝宗初即位詔云朕躬有過失朝政  
有闕遺斯民有戚休四海有利病並許直言先生謂



聖躬雖未有過失而帝王之學不可以不熟講蓋言  
御簡策不過諷誦文辭求大道不過留意老釋也謂  
朝政雖未有闕遺而修攘之計不可以不早定蓋言  
金人乃不共戴天之讎而講和則無一可成之事也  
謂四海之利病繫於民生之戚休民生之戚休繫於  
守令之賢否而本原之地在乎朝廷言不自朝廷擇  
監司以察州縣雖今日降一詔明日行一事欲以惠  
民而適增擾欲以興利而適重害也未復獻說以為

此正所以仰承太上皇付託之意願總紛更之疑

庚子應詔封事 謂國之大務在恤民恤民在省賦省  
賦在治軍其本又在人主正心術以立紀綱而歸極  
於一二近習得以賣債帥之弊其言哀痛切至貼黃  
乞至御前開拆

戊申封事 退朝後屢詔不起而以書對也謂大本在  
陛下之心急務在輔太子選大臣振紀綱變風俗愛  
民力脩軍政六者而六者之未理皆原於此心一念

之私隨事注釋以期於必感悟且闢老釋管商之說  
終之曰歲月逾邁如川不返不惟臣之蒼顏白髮已  
迫遲莫而竊仰天顏亦覺非昔矣讀之令人揮涕

按先生上續孔孟講明帝王之學遭值壽皇英  
明不世出之主而三上封事皆墮空言其言婉切  
明盡蓋自漢至今能言治道之士莫之能尚而當  
時曾不聞有賞異之者於是異端浸淫之患為可  
畏而先入之說為主有非可旦夕解或者潛藩輔

德之舊必有任其責者矣

已酉擬上封事此光宗受禪之初也講學以正心修身  
以齊家遠便嬖以近忠直抑私恩以抗公道明義理  
以絕神姦擇師傅以輔皇儲精選任以明體統振綱  
紀以厲風俗節財用以固邦本修政事以攘夷狄凡  
十事各盡一陳而總序其意

甲寅擬上封事此光宗違和之後專指久不過宮之事  
明以父子天性之說

癸未奏劄其一勸講大學其二勸絕和議其三勸以修德業正朝廷立綱紀

辛丑奏劄其一勸以災異求言其二勸以正心任賢其三勸以浙東救荒乞撥錢米住催官物等數事其四乞五斗以下小戶免檢放場著為令及行建寧社倉之法其五乞寬紹興府和買其六乞減星子縣稅錢其七乞給白鹿洞勅額

戊申奏劄其一論刑以弼教乞獄訟先論尊卑其二論

清庶獄任選官乞州獄專注閹陞人其三論經總制  
錢乞先將災傷年分盡依分數豁除其四論江西科  
罰乞令帥臣措畫其五論二十七年未有寸效以天  
理有未純人欲有未盡

甲寅行宮奏君臣父子經權之誼以勸寧宗委曲感悟  
光宗其二論讀書窮理其三論湖南重賦其四論邵  
州寨柵其五論潭州城壁

乞進德劄勸以湯武反之之功

乞進講劄勸不間寒暑假故日分

乞省詳封事乞瑞慶節不受賀

經筵留身四事其一勿葺東宮其二盡禮過宮其三不聽左右其四山陵改卜

論災異劄因都城黑煙乞修德  
論喪服劄因太上違豫乞承德

乞修三禮劄欲闕借祕省禮樂諸書

經筵進講大學止誠意章大略與章句或問同惟闕繫

人主身上處更覆懇切至如惡惡臭如好好色直以  
為好善惡惡之真恐只是發於必然之實意無自欺  
耳如乍見赤子將入井皆是舉一以槩真心之發見  
當以後來者為正

祧廟議 異於禮官之議者三禮官欲以太祖居第一  
室今議以僖祖擬周后稷居第一室用順太祖尊祖  
之心禮官欲以僖祖以下者居夾室今議以宣祖以  
下者居夾室謂以子孫祔於僖祖則為順不可轉以



僖祖反祔於子孫禮官欲一世為一室兄弟代立者  
同一世今議以一帝為一室以太祖太宗仁宗高宗  
為世世不祧在七廟數外而祧真宗英宗又謂以僖  
祖為始祖之廟議雖出於王安石為司馬公所非而  
程頤實主安石之說

山陵議 謂納音坐丙向壬之說非禮經葬北方北首  
之義而紹興地淺氣洩當尋富陽臨安等縣

南康諸狀乞減星子縣稅及因旱乞截留綱解倚閣官

物奏補賑濟人戶告身及乞賜白鹿洞書院勅額及  
頒降九經

浙東諸狀乞撥會子度牒救荒給降賑濟告身減丁錢  
住催官物 捕蝗大者每斗百文小者每升五十文  
巡歷諸州每州復奏事宜次年游饑乞悔過謝天責  
躬求言盡出內庫助費詔戶部催理舊欠乞住催云  
輸納而後賑恤猶割肉啗口謂蘇軾言熙寧荒政費  
多無益以救之遲故也謂修水利費短利長到岷縣

用錢三十文糴稗一升繳進

乞修黃岩堰閘謂水利修則黃岩可無水旱之災黃岩熟則台州可無飢饉之苦

乞減紹興和買謂浙東惟温州無和買餘六州共二十八萬一千六百疋有奇而紹興獨當十四萬六千九百有奇而會稽縣元科納一疋者今二疋半緣立法之初先支見錢漕臣私於越而又復私於會稽故所拋獨多而貽害如此今欲去紹興和買之弊而不先

減當日請本之額如負千鈞脊背不堪不減所負之物但移而寘之懷袖必無益矣

乞減鹽酒義役欲行二稅鹽萬戶酒皆福建法也義役則謂處州預排者有害欲依山陰置田助當役者而不預排

按唐仲友六狀始行以丞相王淮之庇也道誼之不敵勢利如此

守漳州奏減折茶錢龍眼荔枝乾錢豐國監鑄不足鉛

本錢趙不敵所增無額錢大略謂官吏無狀避罪希賞不能仰體聖朝愛民厚下之本意不顧郡計之盈虛民情之苦樂既已增立虛額於前而又強為登足於後不過因民之訴訟而科罰之甚則誘人以告訐而脅取之

條奏經界先乞擇官次乞戶部給紹興打量攬筭印本次乞圖帳書筭官為出費次乞通縣均紐次乞官田槩量而辰戌丑未年更薄次乞召買廢寺田產

乞褒錄高登其人嘗同陳東上書後為靜江古縣令不肯為秦檜父立祠為潮州試官論直言不聞之可畏策閩浙水沴之所由檜益怒削官貶死容州

申請

自為同安簿即申學校及昏禮等事為南康申造甲不可為例增種麥徒相為欺新寨合廢石堤合脩軍治不可移湖口縣而建昌星子縣不可改隸江州木炭乞免折價謂農桑家有木無錢而畸零絹不可折錢

反重及乞定五禮乞祀泗水侯孔鯉乞加封陶威公  
侃且述劉義仲吳澣論贊辨夢登天折翼之誣

論督責稅賦狀督責二字考之前史則韓非李斯慘刻  
無恩誑誤人主之術非仁人之所忍言也慮傷治體  
不敢奉行

差役利害狀 朝廷罷支者戶長錢以充經總制而此  
等重役遂一切歸保正長

經界申狀鄭昭叔知僊遊縣丞經界行移軍思數日洞

曉以告同官使洞曉又使保正長無不曉然後打量  
兩月而辨

湖南飛虎軍辛弃疾荆置後改隸襄陽相去千二百餘  
里非便

二十二二十三卷皆辭免狀自初乞嶽祠至乞致仕

書

與鍾戶部論經總制欠錢謂民所不當輸官所不當得  
制之無藝而取之無名自戶部四折而至於縣不過



巧為科目而取之民是時先生方為同安簿領而憂天下如此

與李教授及陳宰書皆言瞻學錢州縣得通用

與黃樞密書謂逆亮之死正當以為憂

與陳漕論鹽法謂福建上四州歲運一千萬斤而漏落者何啻數百萬斤欲罷海倉及下四州諸縣之買納使客人請引南自漳泉北至長溪從便徑就埧戶買販可增至千五百萬斤愚恐此事不可盡利以遺後

害也豈先生偶未之思耶他日與趙子直書云欲明  
申恐增賦當以此說為正

與陳侍郎書謂主講和而有獨斷而有國是二者大患  
之本

賀陳丞相書謂一日立乎其位則一日業乎其官一日  
不得乎其官則不敗一日立乎其位繼此所與書皆  
責之之語矣

與汪尚書書謂省闈主蘇氏貢舉議為未知講求他日

不可施於天下又書謂呂申公家一二議論悖理而明公篤信之繼此所予書亦皆責之矣

答張敬夫書論復讎之名義 又書論將帥屯田及帥司團教為勞費強盜枉法殺傷犯奸從人皆死為太過 又書請力為君相言問學 又書言孟子一書最切今日而以財用之柄屯田之議今日養成無出此二者

與胡守等書論荒政

與呂伯恭書謂向見吾兄於儒釋之辨不甚痛說又書論出處謂欲葺文字以待後世

與韓尚書龔叅政陳丞相等書皆論出處痛快語也

與史丞相等書皆力求歸

與皇甫帥書言湖廣之寇當募土人討之

與丞相書乞為白鹿洞宮云與其崇奉異教香火為名而無事以坐食不若修祖宗令典使以文學禮義為官而食其食之為美

與南康諸縣議荒政書謂由軍而縣方能推以及民  
上宰相書謂以荒政之急為緩自古國家傾覆之由何  
嘗不起於盜賊盜賊竊發之端何嘗不生於飢餓今  
朝廷愛民不如惜費之甚明公憂國不如愛身之切  
其言苦至所當成誦

與趙帥子直書論舉子元令兩鄰附籍未為便當今有  
孕五月即四鄰先取本家乞附籍狀 又書乞免起  
精舍 又書言福建賣鹽事欲申明則恐增賦

答林澤之書論汀寇事當奏勅官吏致變者以謝其人  
倚閣錢物以慰人心不致響應即募土人捕之而禁  
軍決是無用

與陳福公書謂憂在天變地動而境外事不預焉

與陳丞相書謂易不易讀且讀詩書論孟

與史太保書責以變異重仍而不發一言 又書勉以  
勸主上求言

答唐帥書戒以勿刊諸經說又言先儒經解不以已姓

名加經上 又書謂浙中恠論百出頗自附於伯恭  
又謂科舉業伎倆愈精心術愈壞

答陳同父書奉告老兄且莫相攬掇留取閒漢在山裏  
咬菜根了却幾卷殘書 又書云世間事思之非不  
爛熟只恐做時不似說時人心不似我心孔子豈不  
是至公血誠孟子豈不是龐拳大踢到底無著手處  
愚竊意龐拳大踢必就用陳同父來書中語然以此  
形容孟子亦不害其為救世之精采也

與張元善書自言平生辭官只是兩事一則分不當得  
二則私計不便若是本等差遣力之所能堪豈有不  
受之理 又載虞丞相除蕭果卿御史蕭曰彼見吾  
憤憤謂我不能言而以是處我也其輕我甚矣首論  
其黨遂併攻之論者服其勇云

與黃仁卿書請祠事云亦似不必如此隨分仕宦不起  
患得患失之心何處不是安地

與趙帥書言招填禁軍緩急何足恃賴正當別作措置



以漸消除 又書言拘集海舡事差官點視即時放散令於界內漁業不得拘留

與留丞相諸書極言漳州失經界及朋黨事 又云朝士有不願為忠臣之說恐不得為興邦之言也愚謂魏徵忠臣也故可自言不願若他人不願是甘為佞臣非欲堯舜其君直諛其君為堯舜而已此說真不可不以為戒 又按晦翁漳州經界為吳禹圭一人之訴而罷與趙帥書極言之

與趙尚書書謂無可用之才出門牆又書謂改更學校之政為閒慢及趙為丞相又責以祧廟非禮於答黃仁卿書稱趙乃謂韓是好人今日弄得朝廷郎當自家亦立不住蓋時趙已罷相矣初先生貽趙書謂任天下事當自格君心之非始而格君心又當自身始最後謂今而後知丞相大不相知然則趙雖賢相先生後亦因國論而踈他何望焉若其與留丞相書直責其聽邪言罷經界決不復為之用

與楊子直書謂喻於義為君子喻於利為小人而近年  
一種議論乃欲周旋於二者之間回互委曲費盡心  
機

答汪尚書諸書論前輩於釋氏未能忘懷則以身譬之  
而誘以求所安之是非其辭婉甚及論兩蘇與王氏  
異同則以孟子天討明之謂王氏僅足為申韓儀衍  
蘇氏學不正而文成理其弊又不止楊墨其辭甚嚴  
蓋釋氏人皆知其為異端心自習熟而嚮之故使人

心反思其是者之是安蘇氏聲名文學震動一世未嘗有以為非故非峻辭以闢之則人莫悟也程子謂高祖有服不可不祭雖七廟五廟亦止於高祖雖三廟一廟亦必及於高祖但疏數不同耳宋公以外祖無後而歲時祭之先生謂不若為之置後

與張南軒諸書謂胡氏改姪字稱猶子未安謂節祠當隨俗但不當用此廢四時之正禮謂伯恭漸釋舊疑蓋佛學也又謂其日前只向駁雜處用功又出入

蘇氏新巧壞心

謂明道之言通透灑落渾然天成

伊川之言質慤精深可奪天巧

謂以敬為主則內

外肅然不忘不助而心自存不知以敬為主而欲存  
心則不免將一箇心把捉一箇心外面未有一事裏  
面已不勝其擾擾儒釋之學只於此分如云常見此  
心光燦燦地便是有兩箇主宰不知光者是真心乎  
見者是真心乎他日先生與汪尚書又謂不學不思  
而坐待忽然有見就便僥倖於恍惚之間亦與天理

人心叙秩命討之實了無干涉自謂有得適足為自私自利之資此則釋氏之禍橫流稽天而不可遏有志之士隱憂浩嘆而欲火其書也愚按論佛教之害政古惟一昌黎論佛教之害人心今惟一晦翁害政之迹顯而易見害人心之實隱而難言故闢佛者至晦翁而極論春秋正朔謂加春於建子之月愚謂此說尚當考訂古今三統各以其時受朝貢可也四時有定春實在寅而移加於建子之月於義何居且

豈所謂行夏之時者耶

答張南軒云漢儒可謂善說經者不過只說訓詁又云解經但可畧釋文義名物而使學者自求之又自云傷急不耐之病苦未能除若得伯恭朝夕相處當得減損又云子壽兄弟氣象甚好盡廢講學而專務踐履於踐履中要人悟得本心此為病之大者夜氣不足以存不是存夜氣是存心

與南軒論癸巳論語說一一疏駁其未然愚按南軒多

是統說大體又多於本意上生新意晦庵則分文釋  
句只依本意而使學者自得之以南軒高明若此今  
為晦庵所疏駁猶未可安況新學晚生不經師匠而  
可自是其說者乎晦翁之盡言南軒之受益皆後學  
所當自反而以兩說叅訂可使人長一格尤宜詳味  
也

答南軒論良心發見處謂即日用之間渾然全體如川  
流之不息天運之不窮而鳶飛魚躍觸象朗然論



心性情之別謂情根乎性而宰乎心中節不中節之分特在乎心之宰不宰而非情能病之 又謂盡心知性知天孔子謂天下歸仁者也存心養性以事天顏冉請事斯語之意也 又謂有天地後此氣常運有此身後此心常發要於常運中見太極常發中見本性 又謂理之至當不容有二若以必自己出而不蹈前人為高則是私意而已 又論仁謂仁者生之性愛其情孝弟其用公者所以體仁上蔡所謂知

覺只是智之發用處謂仁者心有知覺則可謂心有知覺為仁則不可 又論未發之旨謂思慮未萌而知覺不昧是靜中動事物紛糾而中節不差是動中靜

答東萊書來教謂吾道無對不必較勝負恐吾道中着不得許多異端邪說 學校之政名存實亡徒以陷溺人心敗壞人心不若無之為愈 論說左氏亦頗傷巧恐後生傳習重為心術之害 精騎恐誤後生

讀書愈不成片段 人心至靈只自家不穩處便須  
有人點檢 外事十損四五矣但恐密切處不似外  
事易謝絕 清議二字記是劉元城語

答東萊書謂佛老文字贊邪害正者雖工不可取 文海

廬阜竒處盡在山南南康作劉凝之庵以俸給不應  
得者為之 凡此隨俗漸乖宿心 子靜近却說人  
須讀書講論但不肯翻然說破今是昨非之意 子  
靜約秋涼來遊廬阜渠兄弟豈易得但子靜似猶有

此舊來意思回思鵝湖講論時是甚氣勢今何止十  
去八耶 子壽之亡極可痛惜近得子靜書云已求  
銘於門下屬某書之此不敢辭 子靜到此數日講  
論比舊亦不同又云子靜舊日規模終在熹因與說  
渠雖唯唯終未窮竟

答東萊書謂學者推求言句工夫常多點檢日用工夫  
常少 明道箴上蔡博記為玩物渠一向掃蕩明  
道言當與元豐大臣共政此非權譎苟以濟事然亦

須有明道廣大規模和平氣象誠心感人然後盡其  
用耳 范公雖不純師程氏觀其辨理伊川之奏豈  
盡以東坡為是 橫渠墓表出於呂汲公溺於釋氏  
非深知橫渠者 為學之序為已而後可以及人達  
理然後可以制事

答劉子澄書聖賢立言本自平易今推之使高鑒之使  
深 明道嘗為條例司官而伊川作行狀不載明道  
謂青苗可且放過而伊川於西監一狀計較如此明

道乃孔子之獵較伊川乃孟子之不見諸侯也學者  
只當以伊川為法愚謂此魯人善學柳下惠之意也  
合以答東萊說明道欲與熙豐大臣共政一段參看  
溫公論東漢黨錮為光武明章之烈而不知建安  
以後士大夫不知有漢室却是黨錮之禍毆之如荀  
淑正言於梁氏用事之日其孫爽已濡迹於董卓專  
命之朝及其孫或遂為曹操之臣想當時自有一種  
議論文飾 荊州地平守當在外 趙子直只要尋

箇不說話底人宜乎作貴人也更進一步參到周子  
充地位矣 居官只押文字便是進德修業地頭

答陸子壽諸書反覆論喪祭之禮答陸子美書辨詰太  
極西銘至再而止答陸子靜書辨詰尤切條其理有  
未明而不能盡人言者凡七終又隨條注釋斥其空  
疎杜撰謂如曰未然各尊所聞各行所知亦可矣書  
亦於此而止愚按先生平生拳拳諸陸之意不少衰  
相約來游廬阜幸其議論稍回子壽之死子靜亦求

銘於東萊而求書於晦庵道誼之交自若也

答陳同甫諸書大闢其尊漢唐之說意氣軒騰辭鋒峻厲有出師一掃之象同甫終信服亦歲修晦庵始生之禮云

與范直閣書論忠恕一貫謂曾子於一貫之語默有所契指此二事日用最切者以明道之無所不在

與黃端明書謂其有德請納再拜之禮

與王龜齡書謂其有節行聲名而勉之以學



與陳丞相書謂求賢將使正已毋取之投書獻啟之流  
以對偶評天下士

與劉共父書謂有志天下者求士必於無事之時

答鄭景望論舜非輕刑訓釋虞書甚備但欲復肉刑愚  
恐此事當更審若按呂刑則肉刑亦非聖人所制

答尤延之書論揚雄臣賊莽但畏死貪生而有其迹亦  
不免誅絕愚按雄之劇秦美新似不止畏死貪生而  
已莽亦何嘗殺不頌功德者耶然雄後世尊之比孟

子甚至本朝名儒或抑孟而尊揚先生獨奮春秋之  
筆與孔子誅少正卯異事同科亦奇矣哉

答林黃中謂其論室戶及闢邵氏先天之說皆非

與郭中晦論撰著且論易有太極一段以卦畫言之太  
極者象數未形之全體兩儀者一為陽而一為陰四  
象者陽之上生陽為太陽生陰為少陰陰之上生陽  
為少陽生陰為太陰八卦者太陽上又生陽為乾生  
一陰為兌少陰上生陽為離生陰為震少陽上生陽

為巽生陰為坎太陰上生陽為艮生陰為坤 又書

論西銘理一分殊

答程可久黍尺及先天圖又云不須別立門庭

答程泰之撰著之法及論焦延壽以震離兌坎直四時  
十二辟卦直十二月分四十八卦為公侯卿大夫而  
六日七分之說生焉初無法象本無可據不待論其  
減去四卦二十四爻而後見其失揚雄太玄次第乃  
全用焦法其八十一首亦去震離兌坎而但擬六十

卦 又書疑東陽陵即今已陵敷淺原即今廬阜敷  
陽山正在廬山西南 老子儼若容一本容作容字  
協韻

答李壽翁謂麻衣易說收拾佛老術數緒餘戴主簿名  
師俞者所造

答袁機仲諸書袁謂河圖洛書不足信先生謂無柰顧  
命繫辭論語皆有是言袁謂邵子先天之說不足信  
先生謂自初未有畫說六畫滿處為先天伏羲所畫

及卦成後各因一義推說則後天之學而文王所演  
其餘答卦位納甲等說纖悉具備且寄以詩曰忽然  
半夜一聲雷萬戶千門次第開若識無心涵有象許  
君親見伏羲來其意象殆有不知手舞足蹈者矣終  
不從先生嘆曰信乎其道之窮矣 謂參同書本不  
為明易乃姑借此納甲之法以寓其行持進退之候  
異時每欲學之而不得其傳無下手處不敢輕議先  
生蓋自貶以譏袁之輕議也愚接近世趙一岩編易

序叢書乃直指此為先生欲學參同而不能先生豈欲學參同者哉燭破如此明白又豈不能者哉

與周益公諸書謂先君子喜學荆公書愚按荆公書正蘇公所譏笑者所好不同每如此然荆公書恐亦終非可訓者 又議論呂許公范文正相與其後歐公載同心國事而忠宣削之曲盡其情愚謂忠宣削之誠是也文正平生為呂公所賣晚不得已卒為國家強起耳歐公他人也不知其細可為兩家調停之語

忠宣為人之子家庭之所聞見悉矣豈可厚誣乃翁心事哉

答耿秉謂入浙從士大夫遊所聞無非枉尺直尋苟容偷合之論心竊鄙之

答薛士龍謂自熙寧立教官學者不得自擇師是以學政名存實亡

答林謙之謂自昔聖賢教人莫不以孝弟忠信莊敬持養為下學之本今之學者例以為鈍根小子之學無

足留意其平居道說無非子貢所謂不可得而聞者  
答柯國林謂自得是自然而得豈可強求今人多作獨  
自之自故不安於他人之說而必已出耳

答許順之謂子韶說得儘高儘妙處病痛愈深又一書  
近聞越州洪适欲刊張子韶經解為之憂歎不能去  
懷 半畝方塘一鑑開天光雲影共徘徊問渠那得  
清如許為有源頭活水來此詩亦見答許順之書中

答范伯崇謂在喪廢祭古人居喪皆與平日絕異故宗



廟之祭雖廢而幽明之間兩無憾焉今人居喪平日之所為皆不廢而獨廢此一事恐亦有未安卒哭奠後用墨衰常祀於家廟可也按禮外祀雖喪不廢內禮純吉左傳僖公三十二年卒哭特祀於文烝嘗禘於廟者春秋時禮之變

力學之說見與魏應仲書居官之說見與范伯崇書皆當寫出服行者也

影堂奉主之說見答劉平甫書

答何叔京猛省提掇僅免憤憤一少懈則復惘然此正

天理人欲消長之機不敢不着力 孔明出祁山略

數千戶而歸蓋所以全之 孟子艾讀為又有斬絕

自新之意 狼疾古字通用不必言誤 墨氏以儒

者親親之分仁民而親親反有不厚釋氏以儒者仁

民之分愛物而仁民反有未至 又謂馮道許以具

臣已過

答吳叔京書謂存者道心亡者人心愚意理雖相近語

各有為人心道心是狀體段之隨異操存舍亡是指  
效驗之相反今以存者為道心一念之復本體固由  
是而全若以亡者徑為人心則恐亡是放而不求之  
謂於人心何有或者人心止是飲食飢渴之類晦翁  
自謂雖上智不能無人心則人心非亡之謂也 又  
書謂仁是用功親切之效一見疑之徐讀至盡處晦  
翁自注云此句有病以此知後學讀前賢之書何可  
執一言為據且如連日點校亦粗知其方惜未能閒

居靜觀也 又書謂所學繫於所稟愚按此語類程  
先生稱往雖學作分所貴者資但繫之一字更合斟  
酌蓋學本期以變化其氣稟之偏但人自各隨其稟  
以有成就而能自變者惟其人耳 又書說體用顯  
微以理象而言極分曉

答馮作肅書謂性死而不亡若以天地為主則非有我  
之所得私若以我為主是乃私意之尤者釋氏正如  
此

答連嵩卿天下歸仁只以仁歸之如宗族稱孝之類

答程允夫謂蘇黃門早拾蘇張之緒餘晚醉佛老之糟

粕古史皆不中理 又書謂其陰險元祐末年規取

相位力引小人楊畏使傾范忠宣 又謂蘇氏族孔

文仲去程子文仲後悟嘔血至死事見呂正獻遺書

答胡廣仲論性謂真是指本體而言靜則只是情之未

發非以靜狀性 又書辨太極七疑

與呂晦叔論祭儀廟皆南嚮主東嚮廟在所居之東南

又書辨周正 又一書答林擇之說三代正朔尤  
詳然皆疑辭

與石子重書聞洪适在會稽開張子韶經解此禍不在  
洪水夷狄猛獸之下 館職又與學官不同者神宗  
嘗許其論事 曾哲舍瑟見從容不迫灑落自在之  
意亦見狂處

答陳明仲書多辨佛學 又書言別廟者凡五等

答李伯諫書謂以釋氏為主然敢詆伊洛而不敢非孔孟

者直以身為儒者耳豈真知孔孟之可信而信之哉  
又書云却是從儒向佛故猶以先王之言為重若  
真胡種族不招認此語矣所以煅煉之如此又云便  
欲立地成佛正如將小樹來噴一口水便欲他立地  
干雲蔽月豈有此理所以開曉之又如此伯諫終以  
此回心云

答吳公濟諸書亦辯佛

答林釋之謂古人自小學中涵養成就今人無此工夫

但見大學以格物為先便欲以思慮求之又書云日用間常切點檢氣習偏處意欲萌處與平日所講相似不相似

答蔡季通書託以教子令韓歐曾蘇之文滂沛明白者揀數十篇令成誦 所論及鍾律星經易圖陣法琴說卦氣等而譏林黃中袁機中妄非邵氏蓋季通實先生博古之友也

與方伯謨書多論易語孟 又云禱雨到天師前燒香



便記着後漢書何緣有效

答梁文叔書論制度謂求義理論看史謂且當治經

與吳茂實書謂陸子壽近講學其徒有曹立之萬正淳  
極佳

與任伯起書謂今士大夫能言真如鸚鵡

答江德功多論經書謂近世溺於佛學而辨其易說之  
非

與黃真翁論經

答曹子野論史

答虞士明論易論語

答游誠之謂功夫用力處在敬而不在覺

答丘子野辨莖短龜長之說及老子等說

答李深卿辨儒釋及呂氏之學甚詳

答楊子直論太極極詳蓋出所讀者

答廖子晦及鬼神之說 又舉陳了翁事證其處變

蔡法沙灰隔螻蟻炭屑隔木根 十二律各以本律

為宮而生四律

每間一律中  
間者間二律

為二均之聲變宮變徵

者自宮而下六變七變而得之乃十二律之本聲

間日之所由謂之黃道而月有九行黑道二出黃道

北赤道二出黃道南白道二出黃道西青道二出黃

道東并黃道為九日月之行不同如此何以同度而

食答謂日之南北雖不同然皆循黃道而行日月道

雖不同亦常隨黃道而出其旁朔則同在一度望則

遠而相對弦則近一而遠三其交蝕如一人秉扇一

人執燭而過說在詩十月之交孔疏甚詳

答曾致虛云誠字在道則為實有之理在人則為實然之心而其維持主宰全在敬字 白鹿只作禮殿不為象設依開元禮臨祭設席

答黃商伯及喪服制度 位牌法只卧之於地

答唐元善攻其治詞業之失甚至

答潘叔度云整齊嚴肅則中有主而心自存 又云江

南之業恐自是慶厯元祐之功

答潘叔昌謂建州有徐枋者常言始皇賢於湯武管仲  
賢於夫子 荀彧未見其有扶漢之心其死何足悲  
四十七卷皆答呂子約書所問似覺纏繞細膩費先生  
之說甚多使人厭倦

答呂子約書 四十八卷 多不切之問纏繞不了 先生  
謂伏羲神農見於易大傳八卦列於六經史遷獨遺  
而不錄六國表所謂世易變成功大議卑易行不必  
上古貨殖傳譏長貧賤而好語仁義為可羞伯夷傳

辨許由事固善然其論伯夷之心正與求仁得仁者相反

答王子合云送伯恭至鵝湖陸子壽兄弟來會講論之間深覺有益先生與一時諸儒切磋者如此近世乃誤以為朱陸會爭之地甚者至立學以主陸可歎也

已全聞改  
曰宗文

先生居喪時家祭不行及至時節略具

飯食墨衰入廟酌酒瞻拜愚謂此以義起禮孝子慈孫之志盡矣應世接物隨分應副子合問孟子

道性善伊川以為本明道言其繼何也先生謂明道就發明處說伊川是對氣質而言 問八卦之位如何答謂康節說伏羲八卦乾南坤北文王重易更定此位大槩近於傳會穿鑿且置之愚按先生專主邵氏之易而今其說又如此然則後生且讀文王易足矣他将焉考心經界事先生自謂少時見所在立土封碑皆為人題作李椿年墓

答滕德粹云四明多賢士所識者楊敬仲呂子約 監倉

所聞者沈國正煥袁和叔到彼皆可從游也

答楊元範謂元亨利貞文王只是大亨而利於正至象傳文言乃有四德之說愚謂此平實語又謂陰陽只是一人陰氣流行即為陽陽氣凝聚即為陰愚謂此通透語

潘恭叔問答謂桓公非殺兄管仲非事讎荀卿謂糾為兄薄昭謂糾

為弟謂鄭氏不曉周禮篇章之文以七月一詩分三體篇章之幽雅豳頌以大田良耜諸篇當之不然即



別有詩若如鄭說以四章半為豳雅三章半為豳頌  
成何曲拍耶 風皆自然如風動物而成聲若謂關  
雎周公所作只與後世撰樂書相似 卷耳是欲酌  
酒以解其憂傷

答鄭仲禮若無存養實踐而但欲曉解文義雖盡通諸  
經不錯一字亦何所益 高氏遣奠祝詞形神不留  
者非是據開元禮作靈辰不留 吉凶祭以讀祝居  
主人左右為別

答程正思說訟葬地與其得直於有司不若兩平於鄉  
曲之為愈也 致知力行論先後致知為先論輕重  
力行為重 異論紛紜不必深辨切不可於稠人廣  
坐論說是非著書立說肆意排擊愚按先生平日衛  
道之嚴迹多類此豈非有先生之學則可耶然吾徒  
真不可以不戒也 浙學尤更醜陋如潘叔昌呂子  
約皆深陋

答周舜弼行篤敬執事敬字本不為默然無為時設

須向難處力加持守 訓釋致中和之注頗詳

答董叔重書叔重論殷之三仁有云當與社稷俱存亡  
不可復顧明哲保身之義愚按明哲保身但存進退  
之節非謂貪生畏死若死得其所是於明哲保身非  
相反也 論河圖洛書天地之數皆五 論禹貢稱  
漢水入江匯為彭蠡恐當時地入三苗禹亦不能細  
考江流甚大漢水入之未必能有增益今人不敢說  
經文有誤多回互耳愚謂彭蠡自受江東西之水以

入於江亦猶漢水受荆襄等之水而附入江也若謂  
彭蠡因漢水入江之勢相衝洄洑不能射注直下而  
名之為匯則可若謂漢水之盛江不足以容而匯入  
為彭蠡則不可 凡言五世祖者自本身通數 艮  
其背不獲其身只見道理當止處不見己身之有利  
害禍福也行其庭不見其人只見道理當行處不見  
在人之有強弱貴賤也 為銘墓云因得好好行狀故  
不費力

答黃子耕祭禮神主惟長子奉之支子居官或旋設位以祭仕官既未免出來只得忍耐更看自家分內許多道理甚底是欠缺底隨處操存隨處玩索不妨自有餘樂何至如此焦躁耶調遠邑而歸既無冒進之嫌又絕矯亢之累經界打重法人於田段中間先取正方步數却計其外尖斜屈曲處約湊成方却自省事

答曹立之陳太丘亦是不當權位故可逶迤亂世若以

其道用之朝廷而無所變通亦何望其有益人國哉  
答萬正淳正淳論舍生取義謂義當生則生豈謂義與  
生相對為輕重謝氏乃謂生秉於義則舍義取生且  
義而可舍雖生無益矣王淳引張子謂君子之道  
天地不能覆載恐失之太高子思雖云天下莫能載  
復云天下莫能破大小兼該可也愚竊意莫能載者  
喻其大之極謂君子語道之廣大也莫能破者喻其  
小之極謂君子語道之精微也破之一字注解未甚

訓釋愚竊意粟粒之小針可破之若愈小則雖針亦  
無所用其巧故曰莫能破焉 春秋滕杞諸國書伯  
書子不常正淳謂當時以爵之大小為貢之多少故  
有職貢不共而自貶其爵者如子產爭於平丘之會  
及吳晉黃池之會可見先生云沙隨說正如此 游  
楊為老莊之說陷溺得深 橫渠說乾卦恐皆過論  
易有伊川傳只看此尤妙

答吳伯豐書多論讀大學詩論語西銘所言多與先生

契合先生託以詩傳補脫及編祭禮

答葉永卿先天圖具推行之法

答劉公度書譏臨川荆舒祠記譏陳君舉只要雜博色  
衆說不相傷葉正則亦是如此聖門教學循循有序  
無有合下先求頓悟之理

答劉季章謂今人讀書背却經文橫生他說 又說古  
聖賢只見義理都不見有利害可計較應事接物直  
是判斷分明推以及人吐心露膽亦無回互 孟子



說未有義而後其君雖是理之自然到直截剖判處却不若董生之有力 謂善類消磨得盡之說若消磨得去此人便不濟事

答胡季隨南軒文最好是奏議異時自作一書 又書論戒懼謹獨兩節文義極分曉可以細讀 為學不厭卑近愈卑近則工夫愈實而所得愈高遠其直為高遠者反是 自謂灑落者乃是疎略放肆之異名兩字本是黃太史語延平先生拈出是要學者識深

造自得氣象不謂不一再傳其弊至此古之聖賢只是教人於下學處用力至此等處未嘗言也

答高應朝講義若不教人以日用工夫只學得一場大話

答沈叔晦書謂刻東萊文真偽相半惟大事記有益

答所問兩塗之疑謂聞道讀書湏告以所謂道何道所謂書何書聞之讀之又如何用其力更願審叩以決其是非愚謂先生以其受象山之學故其說如此

所謂引而不發者耶再答讀書數條先令虛心熟讀  
本文若便雜諸說下稍只得周全人情恐亦闢其先  
入為主者

答孫季和書季和自謂病在輕弱先生令痛下功夫知  
行並進又與論中庸太極等說且云浙間學問一向  
外馳百怪俱在亦頗覺有弊否

答石應之書云富貴易得名節難保

答諸葛誠之書皆言與子靜辨只是尋箇是處

答項平父亦以其習子靜議論而告以講學工夫

答應仁仲論易本義不自意推尋至此

答王季和謂孔門之教不過孝弟忠信持守誦習之間  
答時子雲謂向編近思錄欲人說科舉壞人心術處而  
伯恭不肯

答王伯豐說參伍字義及畫卦法

答趙幾道謂蘇子古史序於義理綱領見得極分明惜  
其從初為學功本無次序

答楊簡卿書却其求趙帥書云向使前舉未登科不成  
如今亦要舉狀關陞

答吳宜之却其求館求試

答趙昌甫云只固窮兩字是着力處不然即墮坑落塹  
無有是處又士巧言語為人所說易入邪徑如近世  
陳無已不見章雷州呂居仁不答梁師成蓋絕無而  
僅有

答徐彥章論動靜及經疑

答潘謙之伊川亦有時教人靜坐然孔孟以上却無此  
說要須見得靜坐與觀理兩不相妨乃為的當

答李守約持敬工夫只大綱收領勿令放逸亦何必兀  
然靜坐然後為持敬哉

又答李守約庶母謂父妾生子者士服總麻若生已者  
則儀禮有公子為其母之文 因人說琴謾為考之  
然不能琴

答李時可說誠者物之終始云人心不誠則雖有所為

皆如無有若自始至終皆無誠心則徹頭徹尾皆為虛偽 又書云王氏書義序明言是虜說荆公奏議却云一一皆經臣手 又書此書說條例

答包詳道古人為學只是升高自下曾子工夫只是戰兢臨履是終身事中間一唯蓋不期而會

答顏子堅云不念身體髮膚之重天叙天秩之隆方將毀冠裂冕以從夷狄之教顯道不能諫止已失友朋之職節夫更有助緣尤非君子愛人之意聞已得祠

曹牒髡削有斯急作此奉報且更與子靜謀之

答安仁吾生極罵其狂妄將答趙然道書生之兩書合

看極有益

答范叔義謂絜矩之義少日聞之范公如圭字伯達

答趙子欽以其欲湊補易傳七分先生云其曰只說得  
七分者亦曰沉酣浸漬自信自得之功更在學者自

着力耳豈是更要添外科釀玄酒而和大羹也耶

答徐叔載云放翁詩近代惟見此人為有詩人風致



答葉正則責其所著書多籠罩含糊又自謂在荊州看得佛書若見得道理分明便無事殺決不暇看佛書欲得面會相見彼此劇談不須得如此遮前掩後欲說不說做三日新婦模樣

答徐居厚今人但見孔子問禮問官無所不學便道學只是如此却不知得他合下次第大底本領方有功夫到此

答方賓王多論語疑

答陳師德言讀書之法

鄭子上論愛物謂有知之物乃是血氣所生與無知之  
物異恐聖人於此亦有差等先生云此說得之

答林一之文字只就一段看不須引證旁通 又論三  
代什一之法甚詳合細考

答李堯卿多論經疑答陳安卿亦然安卿尤善推廣詰  
難

答張仁叔云什一之法須以周禮為正而參取孟子班

固何休諸說愚恐且當以孟子為正若周禮雖名為  
周公之書而實出於王莽之世不先於孟子也 說  
律呂正聲是全律之聲子聲是半律之聲其說甚詳  
今作圖子輪轉看

答謝成之云詩枉費工夫不切自己淵明所以為高正  
在不費安排處東坡凡篇篇句句依韻而和之雖其  
高才似不費力然已失其自然之趣矣 太極說各  
一其性者云五行各專其一而人則兼備

答陳廉夫云為學工夫不在日用之外檢身則動靜語  
默居家則事親事長窮理則讀書講義大抵只要分  
箇是非而去彼取此耳

答胡平一云周首十一月而春秋書春正月若其下書  
建子月事則改月號而以冬為春若書建寅月事則  
用夏正月而亂周典為胡氏學者乃謂夫子欲行夏  
之時以寅月為歲首所書事則建子月之事無其位  
不敢自專也然月與事常差兩月恐聖人作經又不

若是之紛更也不若缺疑之為愈

答徐子融有性無性之說甚悉云氣質之性只是本然之性墮在氣質中

答宋深之謂子莫執中與三聖執中文同意異及孔孟言性之異

答陳器之公之為仁猶言去其壅塞則水自流通然使謂無壅塞者為水則不可又書云性之綱理有四曰仁義禮智四者之中仁義又是對立關鍵仁義雖

對立而仁實貫乎四者之中智又能成始能成終者也

答葉味道既祔後主復於寢陸子靜不能行而子壽敬伏

答徐志伯四壁環列前輩之象而遊燕寢卧其中非便橫渠言得夫子象無設處為此耳

答鄭衛老問近思錄云王介甫說律是八分書言律之長處又云封建郡縣互有得失理則封建為公

答張敬之云以善服人者惟恐人之進於善愚恐服人  
不過欲人之服已未必忌他人之為善若以晦翁他  
處議論槩之恐此亦於本意上略侵過界分更當俟  
長者而請焉

答林正卿論蔡季通被謫云陳子翁曾作諫官及被謫  
猶着白布衫繫麻鞋赴旬呈朝廷行遣罪人正欲以  
此困辱之若必求免是不受君命也 正卿謂伏羲  
易如陰陽代謝若有推排而莫知其然文王周公易

則六十四卦之名乃十八變後之私記三百八十四  
爻乃三變奇偶之私記潛龍牝馬等物如今卦影勿  
用利有攸往等語如今斷卦之文孔子易則卦名者  
時也事也物也初二三四五上者位也九六者人之  
才也處某事居某時用某物才位適所當則吉否則  
凶先生批云近之 十三卦或云蓋取者疑辭未必  
見此卦而制此物

答龔惟微春秋經文太略諸說太煩且其前後抵牾非



一不若即他書之易知者求之

汪叔耕以太極圖有單傳密付之三昧先生答謂聖賢言語惟恐人之不解豈有故為不盡之言而單傳密付也哉此篇甚詳

答方若水不求只是本分求着便是罪過不惟不可有求之之迹亦不可萌求之之心不惟不得說着求字亦不可說着不求字方是真能自守不求人知也

答方子實主一無適之謂敬只是展轉相解非無適之

外別有主一主一之外又別有敬也

答何巨元云先天圖自復之乾為陽自姤之坤為陰贊  
康節手探足躡者以遇在上而復在下故以手足言  
答吳玘謂道不難於求而難於養康節之告章子厚云  
以君之才於吾之學頃刻可盡但須林下一二十年  
使塵慮消散胸中豁豁無一事乃可相授

答吳斗南說聞道及廟制等兩書其詳可讀

答陳衛道論性理與釋氏兩書比且當讀

答余方叔物性甚詳

趙恭父書奔喪投壺兩篇曲禮之正篇儀禮亦名曲禮  
答趙恭父不得已而從宦惟有韜靜晦默勿太近前為  
可免於斯世耳一或不幸為人所知便不是好消息  
也

趙致道謂程子言仕宦奪人志蓋於室礙處侵侵入於  
隨時徇俗先生云當事事省察而審其輕重

答許生近年有假佛釋之似以亂孔孟之實者其法首

以讀書窮理為大禁常欲學者注其心於茫昧不可  
知之地以僥倖一旦恍然獨見

答汪易直管仲不死子糾而從桓公乃是先迷後得

答潘子善欲專務靜坐又恐墮落那一邊去只隨動隨  
靜無時無處不自省覺 又云揚敬仲其人簡淡誠  
慤自可愛敬而其議論見識自是一般又自信已篤  
不可復與辯論正不必徒為哢哢也

答余彞孫不耕穫不菑畲此又乃自始至終都不營為

而偶然有得之意聖人之無為而治學者之不要人爵而人爵從之皆是也

答林德久韓子說所以為性者五而今之言性者皆雜佛老而言之所以不能不異在諸子中最為近理

又書盡其心者知其性也言人之所以能盡其心者以知其性故也愚按先生以此說性理儘長若以文勢觀之恐合且依諸儒之說順下說去蓋下文有知性則知天一句影帶分曉盡心則知性知性則知天

皆是一串順去道理今若以盡心本於知性則下文  
知天又本於知性恐文理未必然況人豈有不先盡  
其心而一切以性為先者然先生說則以知性為明  
理固宜以明理為先也 又書云仕官只合從選郡  
注擬是家常茶飯今人於堂慣了不覺其非故有志  
之士亦不免俯首其間為人所前却

答歐陽希遜孔子只是說箇為仁工夫至孟子方鮮仁  
字之義理 希遜疑明道言性以為水初出無濁或

泥沙外物汨之此孟子所謂陷溺其心者也豈得以惡亦不可不謂之性嚴時亨又疑才說性時便已不是性深恐啟人致思於杳冥不可究詰之地

答嚴時亨鄉黨雖上齒有爵者席於尊東使自為一列不為衆所壓亦不厭却他人即所謂導也導亦作僕張元德謂許世子止之事左傳云許悼公瘡飲世子止之藥卒公羊云止進藥而藥殺也可見悼公之死於藥矣若當時止偶不嘗世子何為遽棄國而出奔先

生謂於經不見說止出奔事

答甘吉甫云舜居深山尹耕莘野豈不是樂以終身後  
來事業亦偶然耳

答黎忱易經未易讀蓋易本卜筮之書故先王設官掌  
於大卜而不列於學校學校所教詩書禮樂而已至  
孔子乃於其中推出所以設卦觀象繫辭之旨而因  
以識夫吉凶進退存亡之道在今已不得其法又不  
曉其詞而暗中摸索妄起私意不若且看詩書禮樂



之為明白而易知也

答李晦叔問程氏祭儀謂凡配止以正妻一人或奉祠之人是再娶所生即以所生母配先生答云程先生此說恐誤唐會要中有論凡是嫡母無先後皆當合祔並祭又書云方其生存夫得有妻有妾而配祔又非生存之比兄家設主弟不立主只於祭時旋設位以信榜標記祭畢焚之未分五行時只謂之陰陽未分五性時只謂之健順

答李敬子天之外無窮而中央空處有限天左旋而星拱北仰觀可見四遊之說則未可知然厯家乃以筭數而得之非鑿空而言亦與左旋拱北說不相妨如虛空中一圓毬自內而觀坐向不動而常左旋自外而觀又一面四遊以薄四表而止 又云厯說如月令疏及晉天文志皆不可不讀

答胡伯量葬地須擇稍有形勢環抱處廬墓則不必又答李繼善誌石須在墓上二三尺許

答郭子從據周禮賈公彥周人少稱伯某甫至五十乃去伯某甫而專稱伯仲 古用小皮帶束衣而外加大帶故謂之紳申重也 江都集禮祭版皆長尺二寸博四寸五分厚五分下文云八分大書後人以八分連五分難讀至改為五寸八分

答葉仁父身外之事當一切聽天其自至者亦擇其可而受之其不至者則無求之之理也

答孫敬甫說禪學云少曾見某老與張侍郎書云左右

既得此禪柄便可改頭換面用儒家語說向士大夫  
答吳元士論律及琴甚詳

與鞏仲至論詩謂古今詩有三變虞夏以及魏晉為一  
等自晉宋間顏謝以及唐初為一等自沈宋以後著  
律詩下及今日為一等荆公詩選乃就宋次道所有  
序引有費日力於此良可惜也之歎然使老夫筆削  
更當去其半 放翁筆力愈健簡齋詩有合改定處  
龜背文正脊甲五應五行次甲八應八卦又次甲

二十四應節氣

答卓周佐拒其求薦甚詳

與湖南諸公論中和書言性情甚詳

答或人謂經傳之言誠有指實理而言有指人之實有  
此理而言有指人之實其心不自欺者而言

又答或人知得如此是病即便不如此是藥若更問何  
由得如此則是騎驢尋馬只成閒話矣

黃氏日抄卷三十四